

# HIS XAIS

## His Xais, Zaj 1

**Cov lus qhib phau ntawv His Xais.**  
1 : 1.

**1** 1 His Xais uas yog As Mos tus tub  
yees hnov Ntuj tshoj nws txog Yus  
Das teb thiab txog Yes Lus Xas Les,  
thaum lub caij uas Os Xias, Yos Tas, As  
Kas thiab Es Xes Kias ua vaj nyob Yus  
Das teb.

**Tswv Ntuj yuav muab txim rau cov  
His Xas Lais vim lawv tsis nco txog  
Tswv Ntuj.** 1 : 2 - 6.

2 Cov txheej ntuj nej mloog mas ! Ntiaj  
teb koj tig ntsej los mloog ! Vim Tswv  
Ntuj hais tias :

"Kuv tau tu ib co tub kom hlob, kuv  
qhuab qhia lawv, tab sis lawv ntxeev siab  
rau kuv. 2 Tus nyuj nco tau nws tus  
tswv, tus luj cim tau nws tus tswv lub  
dab. His Xas Lais tsis paub dab tsi li.  
Kuv haiv neeg tsis to taub.

4 Ab ! Nej yog ib lub kuj cuab muaj  
txhaum, nej yog ib co pej xeem yuam kev  
loj ! Nej yog ib haiv neeg ua phem, nej  
yog ib co tub xib rau kev phem ! Nej tso  
HUAB TAIS Tswv Ntuj pov tseg, nej  
thuam His Xas Lais tus Ntshiab. Nej cia  
li khiav thaub qab.

5 Yuav ntaus nej qhov twg ntxiv ? Vim  
nej pheej fav xeeb tsis tseg ! Nej lub  
taub hau mob tas huv tib si, nej lub siab  
txom nyem thoob plaws.

6 Txij qab xib taws mus txog saum tiaj  
hau, yeej tsis muaj ib qho uas nej yuav  
tsis mob, nej cov qhov nqaij raug mob, tej  
thaj doog ntshav ua qhov txhab liab  
ploog, nej yeej tsis qhwv, tsis zawm, tsis  
siv roj los pleev kom loog li.

**Yog cov His Xas Lais tsis mloog  
Tswv Ntuj, lawv yuav raug txim.**  
1 : 10 - 20.

10 Cov nom tswv tswj Xos Dos Mas, nej  
mloog Huab Tais cov lus mog ! Pej xeem  
nyob Nkos Mos Las, nej mloog peb tus  
Tswv Ntuj cov lus qhia mog !

11 HUAB TAIS hais tias :  
"Nej cov txim txi Ntuj uas muaj ntau ntau  
suav tsis txheeb, zoo dab tsi rau kuv ?  
Cov laug tthis uas nej muab los hlawv  
mas dhuav kuv kawg. Cov xyuas nyuj tej  
roj uas nej cev rau kuv kuj dhuav kuv.  
Cov laug tthis, cov yaj thiab cov heev  
nyuj tej roj ntsha, kuv tsis xav yuav.

12 Thaum nej tuaj nyob ntawm kuv xub  
ntiag, yog leej twg kom nej tuaj tsuj kuv  
lub tshav ? 13 Nej tsis txhob nqa tej  
txim tuaj rau kuv ntxiv ! Pa xyab yog ib  
yam kuv ntxub. Nej tej hli xiab tshiab,  
nej cov hnub xas npas tos, nej cov txoos,  
nej cov hnub nyooq nqaum paj nqaum  
nruas, mas kuv nyaj tsis taus lawm.

14 Nej tej hli xiab tshiab, nej tej kev  
tawm rooj mus teev Ntuj, kuv ntxub tas  
siab nrho. Kuv ceeb laj ris kawg, sab kuv  
tas nrho, kuv nyaj tsis taus lawm.

15 Thaum nej tsa tes hu txog kuv, kuv  
fee plhu. Txawm nej hais nej tej zaj teev  
Ntuj ntau npaum li cas, los kuv tsis mloog  
li. Nej txhais tes lo ntshav puv tas.

16 Nej rov ntxuav nej kom nej huv tuaj  
mas ! Nej dawj nej lub siab phem mus  
kom kuv qhov muag txhob pom. Nej tso  
txoj kev ua phem tseg !

17 Nej xyaum ua zoo, nej nrhiav kev  
haum pheej, nej pab tus raug luag hiam,  
nej txiav txim ncaj rau tus tub ntsuag, nej  
tuaj tus poj ntsuam tog."

18 HUAB TAIS hais tias :  
 "Nej tuaj ! Nej txiav plaub txiav ntug  
 mog ! Txawm tias nej tej txhaum liab  
 ploog, los nej yuav rov dawb li daus.  
 Tab yog nej tej txhaum liab vog, los kom  
 tej txhaum cia li hloov xws li plaub yaj.  
 19 Yog nej muaj siab tiag thiab nej  
 mloog lus, mas nej yuav tau noj lub teb  
 chaws cov qoob. 20 Tiam sis yog nej  
 nyob hauv kev ntxeev siab, mas hniav  
 ntaj yuav hlais nej."  
 HUAB TAIS lub ncauj hais li ntawd.

**Yuav muaj ib lub caij uas teb  
 chaws nyob thaj yeeb. 2 : 1 - 4.**

**2** 1 Lo lus ua tus Yaj Saub His Xais,  
 As Mos tus tub paub txog Yus Das  
 teb thiab Yes Lus Xas Les.  
 2 Yav tom ntej, yuav muaj ib hnub  
 lub roob uas HUAB TAIS tsa tsev nyob  
 yuav txawb saum cov roob lub ncov, nws  
 yuav sawv siab dua cov pov roob. Tas ib  
 tsoom kuj cuab yuav khiav ua npoj ntws  
 tuaj saum HUAB TAIS lub roob ;  
 3 ntau haiv neeg yuav tuaj. Lawv yuav  
 hais tias : "Nej tuaj ! Peb nce mus pem  
 Yas Kos tus Tswv Ntuj lub tsev ! Kom  
 nws qhia nws tej kev rau peb, thiab kom  
 peb mus taug nws tej kev."  
 4 Tswv Ntuj yuav txiav txim hauv nruab  
 nrab cov kuj cuab. Nws yuav xaiv nyob  
 hauv ntau haiv neeg. Lawv yuav muab  
 lawv rab ntaj ob sab ntse los ntaus ua  
 voom, muab lawv rab hmuv ntaus ua liag.  
 Thaum ib lub kuj cuab sawv los ntaus  
 lwm lub kuj cuab, lawv yuav tsis tsa rab  
 ntaj ob sab ntse. Lawv yuav tsis kawm  
 kev ntaus rog ntxiv.

**HUAB TAIS lub hnub nyoog.**  
**2 : 10 - 19.**

10 Koj nkag mus hauv qhov tsua mas !  
 Koj mus nkaum rau hauv cov hmoov av.  
 Koj nyob deb ntawm txoj kev ntshai  
 HUAB TAIS mog, koj nyob deb ntawm  
 nws lub hwj chim ci ntsa.  
 11 Cov neeg uas tsa hauv pliaj siab yuav  
 dauv muag. Cov neeg txawj tuag uas  
 muab hlob yuav poob tsim. Hnub ntawd,  
 HUAB TAIS tib leeg xwb yuav sawv  
 siab. 12 Vim tus HUAB TAIS kav  
 tsoom tub rog muaj ib lub hnub nyoog,  
 uas nws yuav ntaus txhua tus neeg muab  
 hlob thiab txhua leej uas tsa hauv pliaj  
 siab, nws yuav ntaus txhua yam nyob  
 puag saud uas sawv siab, 13 nws yuav  
 ntaus roob Lis Npas cov ntoo ciab muab  
 hlob thiab sawv siab, yuav ntaus Npas  
 Sas cov ntoo ntseej, 14 yuav ntaus cov  
 roob tsa hauv pliaj siab, yuav ntaus cov  
 hauv pes sawv siab, 15 yuav ntaus cov  
 sam thiaj siab zov tsheej tas tib si, yuav  
 ntaus cov ntsa zeb xov nroog tas tib si,  
 16 yuav ntaus Tas Xis cov nkoj tas tib  
 si, yuav ntaus cov toob xib muaj nqis tas  
 tib si.  
 17 Tib neeg txoj kev muaj ntsej muag  
 yuav poob tsim. Cov tib neeg txawj tuag  
 kev muab hlob yuav raug txo qis. Hnub  
 ntawd, HUAB TAIS tib leeg xwb yuav  
 sawv siab. 18 Cov dab cuav yuav ploj  
 tas, tsis tshuav ib tug kiag.  
 19 Thaum HUAB TAIS sawv tsees los  
 ua kom ntaj teb poob plig, mas sawv  
 daws yuav nkag hauv cov qhov tsua,  
 yuav nqes mus hauv cov qhov ntuj, kom  
 txav deb ntawm kev ntshai HUAB TAIS,  
 kom tau nyob deb ntawm nws lub hwj  
 chim ci ntsa.

**Cov rov los ua lub neej nyob Yes  
 Lus Xas Les. 4 : 2 - 3.**

**4** 2 Hnub ntawd, HUAB TAIS lub noob tuaj kaus yuav hloov ua lub zam nto koob meej. Cov txiv ntoo hauv lub teb chaws yuav ua kom cov His Xas Lais uas dim rov los tau ntsej muag thiab muaj meej mom. 3 Cov nyob Xis Yoos, thiab cov yuav nyob ruaj hauv Yes Lus Xas Les, cov uas lawv sau npe nyob Yes Lus Xas Les tas ib sim neej, luag yuav hu lawv ua cov ntshiab.

**HUAB TAIS yuav rov los roos Xis Yoos. 4 : 4 - 6.**

4 Huab Tais xub tshuab ib pas txiav txim, ib pas rhuav nroog. Nws ntxuav Xis Yoos tej txhaum qias, nws xub yaug cov ntshav uas nyob hauv plawv Yes Lus Xas Les. 5 Ces nruab hnub Huab Tais yuav tsim ib tw huab thiab ib co pa taws vov lub roob Xis Yoos thiab vov cov neeg sib txoos nyob ntawd, hmo ntuj Huab Tais yuav tsim ib lub cub tawg cig cig pom kev lam lug.

6 Nyob puag saud, Huab Tais lub hwj chim yuav ua ib lub kaus ntaub thiab ib lub tshuav, ua ntxoov ntxoo roos tshaw ntuj kub nruab hnub, ua chaw nkaum nag thiab thaiv nag xob nag cuu.

**HUAB TAIS lub vaj txiv cawv.**

**5 : 1 - 7.**

**5** 1 Kuv yuav hu nkauj rau tus kuv nyiam. Yog kuv tus phooj ywg zaj nkauj hais txog nws lub vaj txiv cawv. Tus kuv nyiam muaj ib lub vaj txiv cawv nyob saum ib plag toj av zoo.

2 Nws ncaws, nws dawj pob zeb pov tseg, nws xaiv ib co ceg zoo los cog.

Nyob nruab nrab, nws txhim ib lub sam thiaj. Nws khawb ib lub qhov xwv cawv. Nws vam tias nws yuav tau sau ib co txiv

zoo nkauj. Tab sis lub vaj txi ib co txiv caws maum.

3 Nyem no, cov pej xeem nyob Yes Lus Xas Les, cov neeg nyob Yus Das teb, kuv thov nej txiav txim saib puas yog kuv txhaum, los yog kuv lub vaj txhaum ?

4 Tshuav dab tsi uas kuv tsis tau ua rau nws ? Kuv vam tias nws yuav txi tej ntwg txiv zoo nkauj, vim li cas nws txi ib co txiv caws maum ?

5 Vim li ntawd, kuv qhia nej paub tias kuv yuav ua dab tsi rau kuv lub vaj txiv cawv. Kuv yuav rhuav cov ntoo xov vaj, ces tsiaj yuav ntxo nws, kuv yuav rhuav nws cov laj kab, kom neeg tsuj nws.

6 Kuv yuav ua kom kuv lub vaj puas tsuaj. Yuav tsis muaj neeg tav ntsis, tsis muaj neeg dob nroj, ces pos thiab nroj yuav laum, kuv yuav ua kom huab txhob tso nag los ywg lub vaj.

7 Tus HUAB TAIS kav tsoom tub rog lub vaj txiv cawv, yog His Xas Lais lub cuab, yog Yus Das lub yig, lawv yog cov ceg txiv cawv nws hlub. Nws vam tias lawv yuav ua ncaj, tab sis nws tsuas pom lawv ua ntshav ntws. Nws vam tias lawv yuav mloog Txoj Cai, tab sis nws tsuas hnov neeg ntshai lub suab quaj qw.

**Tswv Ntuj hu His Xais ua Yaj Saub.  
6 : 1 - 13.**

**6** 1 Xyoo tus vaj Os Xias tuag, kuv pom Huab Tais zaum saum ib lub theej kiab siab siab. Nws tw tsho dauv mus puv nkaus lub Tuam Tsev tas huv tib si.

2 Nyob ntawm nws txheej saud, muaj ib co Tshiab Xes Las Fis sawv ntsug. Lawv nyias muaj nyias rau txhais tis. Ob txhais thaiv ntsej muag, ob txhais vov ko taw, ob txhais cia ya. 3 Lawv ib leeg hu nkauj nrov nrov rau ib leeg tias :

## His Xais, Zaj 6 thiab 7

"Tsoom tub rog tus HUAB TAIS ntshiab, ntshiab, ntshiab. Nws lub koob meej nyob puv lub ntiaj teb."

4 Lub suab ntawd nrov ua cov taw ncej qhov rooj ua zog koog, pa taws ncho puv lub tsev. 5 Kuv hais tias :

"Kuv hmoov phem ! Kuv yuav tuag ! Kuv yog ib tug neeg di ncauj tsis huv. Kuv nyob nruab nrab ib haiv neeg di ncauj tsis huv. Kuv qhov muag tau pom tus Vaj, tus HUAB TAIS kav tsoom tub rog !"

6 Ib tug Tshiab Xes Las Fis ya ntxiag los txog ntawm kuv, nws txhais tes tuav ib lub pob zeb kub lug uas nws xuas ib rab caij tais ntawm lub thaj txi Ntuj los.

7 Nws coj lub pob zeb los so kuv di ncauj, nws hais tias :

"Saib ! Qhov no twb chwv koj di ncauj lawm, nws tshem koj qhov yuam kev tas huv si. Nws them koj cov txhaum tas lawm."

8 Ces kuv hnov Huab Tais lub suab hais tias :

"Kuv yuav xa leej twg mus ? Leej twg yuav sawv peb cev mus ?"

Kuv teb tias :

"Kuv nyob ntawm no. Koj xa kuv mus."

Huab Tais hais rau kuv tias :

9 "Koj mus ! Koj yuav hais rau haiv neeg no tias : Nej mloog ! Nej mloog mas ! Nej tsis to taub ! Nej ntsia ! Nej ntsia mas ! Nej pom kev tsis tseeb !"

10 Koj ua kom haiv neeg no lub siab tuab ! Koj ua kom lawv pob ntseg hnyav. Koj pos lawv qhov muag mas ! Tsam haiv neeg no qhov muag pom, lawv pob ntseg hnov, lawv lub siab to taub, ces lawv yuav tig los hloov ib lub siab tshiab, thiab lawv yuav zoo hlo."

11 Kuv hais tias :

"Huab Tais, kuv yuav ua mus txog thaum twg ?"

Huab Tais hais tias :

"Koj ua mus txog hnub cov tsheej piام tas, tsis muaj neeg nyob hauv, cov tsev tsis muaj neeg, liaj teb rhuav tas, sawv daws tu siab nrho."

12 Huab Tais yuav ua kom neeg khiav mus deb, kom sawv daws tso lub teb chaws pov tseg. 13 Yog tias tshuav ib feem kaum, feem ntawd kuj yuav puas tsuaj. Yuav zoo li tsob ntoo tsw qab thiab tsob ntoo ntseej. Thaum ntov tsob ntoo los tseem tshuav lub hauv paus. Nws lub hauv paus yog ib lub noob ntshiab.

### His Xais qhuab qhia tus vaj As Kas. 7 : 1 - 9.

7 1 lub caij As Kas ua vaj mas tus vaj Las Xoos uas kav As Las teb thiab tus vaj Pes Kas uas kav His Xas Lais teb, nkawd mus pem Yes Lus Xas Les. Nkawd xav ntaus Yes Lus Xas Les, tab sis nkawd ntaus tsis tau. 2 Luag tuaj qhia Das Vis tsev neeg paub tias tus vaj As Las tsa yeej tub rog nyob hauv lub xeev Es Fais. Ces tus vaj thiab tsoom pej xeem lub siab tshee cuag li cov nplooj ntoos hauv hav zoov raug cua tshuab.

3 HUAB TAIS hais rau His Xais tias :

"Koj nrog koj tus tub tawm mus cuag As Kas pem lub hauv kwj deg uas ntws mus rau lub pas dej nyob pem toj, ze ntawm txoj kev mus rau daim teb ntxhua seb."

4 Koj hais rau As Kas tias :

"Koj ceev faj, koj ua siab tus yeess txhob ntshai. Txhob ua siab muag nyob ntawm ob tug vaj xub ntiag : nkawd yog ob ya hluav ncaig ncho pa xwb. 5 Ob tug vaj npaj siab ua phem rau koj, nkawd tau hais tias : 6 "Wb mus ped, wb ntaus Yus Das, wb hem nws kom nws swb wb. Wb tsa Tas Npes Ees tus tub ua vaj nyob Yus Das teb."

7 HUAB TAIS Tswv Ntuj hais li no : Yuav tsis muaj li ntawd. Yuav tsis yog li ntawd. 8 Tus ua hau kav As Las teb yog tus vaj Das Mas. Tab sis tos 65 xyoos saum no mas lawv yuav tsoo Es Fais, Es Fais yuav tsis yog ib haiv neeg ntxiv.

9 Yog nej tsis ntseeg mas nej yuav tsis tau ua neej nyob ntxiv.

**His Xais hais rau As Kas tias ib tug tub hu ua Es Mas Nus Es yuav yug los. 7 : 10 - 16.**

10 HUAB TAIS kom His Xais rov mus hais rau As Kas :

11 "Koj thov koj tus HUAB TAIS Ntuj kom nws ua ib lub cim rau koj nyob puag hauv qab ntuj txias teb tsaus, los nyob saum cov chaw siab, puag saum ub."

12 As Kas hais tias :

"Kuv yuav tsis thov. Kuv yuav tsis sim HUAB TAIS."

13 His Xais hais tias :

"Das Vis tsev neeg, nej mloog mas ! Nej ua kom tej tib neeg sab tas nrho, los tsis txaus nej siab ! Nej tseem yuav ua kom Tswv Ntuj sab thiab. 14 Vim li ntawd, Huab Tais yuav pub ib lub cim rau nej. Nej ntsia saib ! Tus poj niam hluas xeeb tub lawm. Nws yuav yug ib tug tub. Nws yuav tis npe rau nws tus tub hu ua Es Mas Nus Es. 15 Thaum nws txawj xyeeb qhov phem thiab xaiv qhov zoo, mas nws yuav noj mis nyuj thiab zib mu.

16 Thaum tus me nyuam tseem tsis tau txawj xyeeb qhov phem thiab xaiv qhov zoo, mas lub teb chaws uas ob tug vaj hem koj, yuav tsis muaj tus saib xyuas.

**Ib tug yug los ua vaj kav Tswv Ntuj haiv neeg. 9 : 1 - 6.**

**9** 1 Thaum ntawd tsoom pej xeem

uas lawv maub hauv qhov tsaus ntuj, lawv pom ib qho pom kev loj. Ib qho pom kev ci tuaj rau saum cov nyob hauv lub teb chaws tsaus ntuj nti.

2 HUAB TAIS, koj tau ua kom kev hom khaj hlob mus, kom muaj chaw zoo siab ntau. Sawv daws zoo siab nyob ntawm koj xub ntiag, ib yam li cov sau qoob loo zoo siab, ib yam li co tub rog sib faib cov toob xib lawv txeeb tau lawv dia lom zem. 3 Tus quab uas tsuam lawv, tus ntas nyob saum lawv xub pwg, tus zov cov neeg nyob txim rab qws, koj muab tsuj, xws li thaum Mas Dias lub hnub nyooog. 4 Cov suab khau tub rog nrov ncha tas huv si, cov tsho tshaj sab lo ntshav tas huv si, nplaim taws yuav noj, hluav taws yuav hlawv.

5 Vim ib tug me nyuam yug los rau peb, Ntuj pub ib tug tub rau peb. Lub tuam teb nyob saum nws xub pwg. Luag tis nws npe hu ua : tus qhia tswv yim zoo tas nrho, tus Tswv Ntuj siab loj, tus vaj txheeb pub kev thaj yeeb.

6 Das Vis lub theej kiab thiab lub teb chaws nws yuav kav yog ib lub tuam teb dav thiab nyob thaj yeeb tsis muaj caij kawg. Nws yuav muab Txoj Cai thiab kev ncaj los tsa thiab nres nws lub tuam teb, txij no mus txog ib txhiab ib txhis. Tus HUAB TAIS kav tsoom tub rog nws lub siab hlub muaj khib yuav ua tej ntawd.

**Tswv Ntuj yuav muab txim rau As Xws. 10 : 5 - 7 + 13 - 16.**

**10** 5 As Xws yuav raug txoj hmoov phem ! As Xws yog kuv lub siab npau taws rab pas, yog rab qws uas kuv txhais tes tuav thaum kuv npau taws. 6 Kuv xa As Xws mus ntaus lub kuj cuab tsis hwm Ntuj. Kuv tso nws mus

ntaus haiv neeg kuv npau taws rau, mus lwg lawv cov toob xib poob pem teb, nws khaws puas tsav yam cov tub rog txeeb tau, nws tsuj haiv neeg ntawd xws li cov av nkos nyob ntawm tej kev hauv nroog.

7 Tab sis As Xws tsis xav ua li ntawd, nws lub siab tsis xav zoo li ntawd. Nws tsuas rau siab tua neeg kom tu noob, nws xav rhuav ntau lub kuj cuab.

13 As Xws hais tias : yog kuv txhais tes muaj zog thiaj ua tau tej hauj lwm ntawd, yog kuv lub tswv yim ua tej ntawd, vim kuv ntse ! Kuv tau nam cov haiv neeg ciام teb, kuv tau lwg cov toob xib lawv tshwj zias cia. Kuv ua tus muaj peeъ xwm, kuv thawb cov vaj zaum saum theej kiab kom poob qis.

14 Kuv txhais tes nthos nkaus cov haiv neeg tes nyiaj txiag xws ib lub zes, xws li sau cov qe hauv lub zes luag tso pov tseg. Kuv tau khaws tas ntiaj teb los ua kuv tug, tsis muaj leej twg nthuav tis, rua ncauj los quaj ib suab.

15 Rab taus puas khav tiv tus tuav nws ? Rab kaw puas tig los kaw tus siv nws ? Puas yog rab pas ua kom tus tsa nws ua tau zog ? Puas yog rab qws muab zog rau tus tuav nws ?

16 Yog vim tej ntawd tus HUAB TAIS kav tsoom tub rog yuav ua kom cov muaj zog tshaj mob tas huv si. Tas txhua yam yuav swb nws lub hwj chim thiab yuav kub hnyiab tas.

**Tswv Ntuj yuav npaj ib roog qav.  
11 : 1 - 9.**

**11** 1 Ib tug ceg yuav hlav ntawm Yes  
Xes lub hauv paus los, ib tug ntsuag yuav hlav ntawm Yes Xes cov cag los. 2 HUAB TAIS lub tswv yim yuav nyob txawm saum nws. Yog ib lub tswv yim thoob tsib thiab ntse, ib lub tswv yim

pab xav tom ntej tom qab thiab pab ua siab loj, ib lub tswv yim paub txuj thiab hwm HUAB TAIS. 3 Nws yuav nrhiav kev hwm HUAB TAIS. Nws yuav tsis txiav txim raws li qhov muag pom sab nraud, nws yuav tsis xaiv kev taug raws li hnov lus moo cua hais. 4 Nws yuav txiav txim ncaj rau cov tsis muaj zog, nws yuav pab cov neeg hauv txheej qis nyob hauv lub teb chaws, nws lub ncauj cov lus txiav yuav ntaus cov siab ceev, nws di ncauj yuav tshuab pa tua cov lim hiam.

5 Kev ncaj yuav yog nws txoj siv sia duav, kev hais qhov muaj tseeb yuav yog nws txoj siv sia ntawm ntsag.

6 Tus hma yuav nrog tus thav yaj nyob, tus tsov pom txwv yuav nrog tus thav tshis nyob ib nkuaj. Tus xyuas nyuj thiab tus tsov ntxhuav yuav ua ke nog zaub, ib tug me nyuam tub yuav caij nkawd.

7 Tus maum nyuj thiab tus maum dais ntaus phooj ywg, nkawd cov me nyuam yuav nyob hauv ib lub nkuaj, tus tsov ntxhuav yuav noj quav nplej xws li tus nyuj. 8 Tus me nyuam mos yuav ua si nyob ze ntawm tus nab liab tsaig, tus me nyuam nyuam qhuav cais mis yuav cev tes mus hauv nab ntsuab lub qhov.

9 Nyob saum kuv lub roob ntshiab, yuav tsis ua phem tsis ua nkhaus, vim kev paub HUAB TAIS yuav nyob puv ntiaj teb, ib yam li dej vov lub hiav txwv.

**Cov uas Ntuj txhiv hu nkauj ua  
Tswv Ntuj tsaug. 12 : 1 - 6.**

**12** 1 Hnub ntawd koj yuav hais tias :  
"HUAB TAIS, kuv cav lus zoo txog koj. Yav tas koj npau taws rau kuv. Tab sis koj lub siab tig mus ces koj nplij kuv.  
2 Nej ntsia tus Tswv Ntuj uas cawm kuv. Kuv tso siab rau nws, kuv tsis txhawj

ntxiv. Kuv lub zog thiab kuv zaj nkauj yog HUAB TAIS. Nws yog tus cawm kuv. 3 Nej yuav zoo siab luag ntxhi mus ce dej hauv cov qhov dej cawm neeg."

4 Hnub ntawd nej yuav hais tias : "Nej cav txog HUAB TAIS mas ! Nej hu txog nws lub npe ! Nej tshaj nws tej hauj lwm loj nyob hauv cov haiv neeg, nej rov hais rau lawv, kom lawv nco tias nws lub npe zoo tas nrho. 5 Nej ntaus paj nruag rau HUAB TAIS ! Vim nws tau ua kom nws lub hwj chim loj nrov ncha ntws kom ntiaj teb paub.

6 Tsoom neeg nyob Xis Yoos, nej seev suab lom zem zoo siab, vim His Xas Lais tus Ntshiab loj nyob nruab nrab hauv koj."

**Tswv Ntuj txo tus tswj Yus Das teb, nws tsa dua ib tug tshiab.**

**22 : 19 - 23.**

**22** 19 Kuv yuav caum koj tawm ntawm koj lub chaw mus, kuv yuav rho koj ntawm koj tej chaw ua dej num.

20 Hnub ntawd, kuv yuav hu kuv tus tub txib Es Lias Kis tuaj. 21 Kuv yuav muab koj lub tsho tshaj sab rau nws hnay, kuv yuav muab koj txoj siv rau nws sia, kuv yuav muab koj tus nom rau nws ua, nws yuav sawv ua cov neeg nyob Yes Lus Xas Les txiv thiab ua Yus Das tsev neeg txiv.

22 Kuv yuav muab Das Vis tsev neeg tus yawm sij tso saum nws xub pwg. Yog nws qhib mas tsis muaj leej twg yuav kaw, yog nws kaw mas tsis muaj leej twg yuav qhib. 23 Kuv cog nws xws li ib tug ntsia nyob hauv ib qho chaw khov, nws yuav hloov ua ib lub theej kiab muaj koob meej rau nws txiv tsev neeg."

**Tswv Ntuj yuav npaj ib rooj qav nyob Yes Lus Xas Les.**

**25 : 6 - 10.**

**25** 6 Nyob saum lub roob no, tsoom tub rog tus HUAB TAIS yuav ua ib rooj nqaij ib rooj hno rau tas cov haiv neeg huv tib si, yog ib rooj qav muaj hlwb puv pob txha, ib rooj cawv ntshiab tsis muaj t xo.

7 Nyob saum lub roob no, HUAB TAIS yuav yaws daim ntaub vov tsoom neeg tib si, yuav rhuav chaws ntaub qhwv tsoom kuj cuab. 8 Nws yuav rhuav kev tuag ib txhiab ib txhis. HUAB TAIS Tswv Ntuj yuav so cov kua muag ntws saum sawv daws lub ntsej muag, nws yuav thou nws haiv neeg chaw poob tsim nyob thoob ntiaj teb, vim HUAB TAIS tau hais li ntawd. 9 Hnub ntawd sawv daws yuav hais tias :

"Nej ntsia peb tus Tswv Ntuj uas peb vam tias nws yuav cawm peb, yog tus HUAB TAIS uas peb tos. Peb kav tsij dhia hom khaj, kav tsij xyiv fab lom zem ! 10 Vim HUAB TAIS yuav tso nws txhais tes nyob saum lub roob no.

**Cov Yus Das hu nkauj vim Tswv Ntuj ua kom nws haiv neeg yeej pej kum haiv neeg. 26 : 1 - 6.**

**26** 1 Hnub ntawd, nyob Yus Das teb lawv yuav hu zaj nkauj no :

"Peb muaj ib lub tsheej khov, HUAB TAIS tsom kwm, nws tsa ntsa zeb ntsa tsua thiab tsa phab ntsa siab.

2 Nej qhib rooj loog mas ! Cia lub kuj cuab siab ncaj thiab ncawg Tswv Ntuj chaws los hauv.

3 Nws tus xeeb ceem khov, koj cia nws nyob thaj yeeb, vim nws tso siab rau koj.

4 Nej tso siab rau HUAB TAIS mus ib txhiab ib txhis ! Vim HUAB TAIS yog lub tsua nyob tiam dhau tiam.

5 HUAB TAIS ua kom cov nyob chaw siab poob rau hauv qhov chaw qis, nws ua kom lub tsheej uas neeg ncav tsis cuag poob hauv pem teb. Nws muab pov hauv plua tshauv. 6 Cov neeg me thiab cov neeg pluag tsuj lawv."

**Hu nkauj thov kom Tswv Ntuj tuaj txiav txim. 26 : 7 - 9 + 16 - 19.**

7 Tus siab ncaj txoj kev yog txoj kev ua ncaj. Koj fawb kev rau tus neeg siab ncaj taug.

8 Muaj tseeb tiag ! Peb tos koj nyob ntawm koj txoj kev txiav txim, peb tus plig ntshaw koj lub npe thiab nco txog koj. 9 Hmo ntuj, kuv tus plig nqhis txog koj, kuv lub tswv yim nrhiav koj nyob hauv kuv nruab siab. Vim thaum koj txiav txim rau lub ntiaj teb, mas cov neeg nyob hauv lub qab ntuj xyaum taug kev ncaj.

16 HUAB TAIS, thaum peb txhawj, mas peb nrhiav koj. Thaum luag quab yuam, thiab thaum koj nplua, mas peb nrhiav koj. 17 HUAB TAIS, peb tau nyob ntawm koj xub ntiaj xws li tus poj niam suab me nyuam yuav daws cev, nws ntsaj thiab tshee.

18 Peb tau xeeb tub, peb daws cev, peb tsuas yug tau cua, peb tsis tau coj kev cawm rau lub ntiaj teb, tsis muaj neeg yug los nyob hauv lub qab ntuj.

19 Koj cov neeg tuag yuav ciaj rov los, lawv lub cev yuav sawv rov los. Tsoom tib neeg nyob hauv plua av, nej kav tsij tsim dheev los mas, nej seev suab qw zoo siab. HUAB TAIS, koj cov lwg yog lwg pom kev nrig, lub ntiaj teb yuav rov pub txoj sia rau cov neeg nyob hauv ntuj txias

teb tsaus.

**Tswv Ntuj ceeb toom tias cov His Xas Lais yuav rov nyob thaj yeeb.  
29 : 17 - 24.**

**29** 17 Tshuav tsis ntev ntxiv lawm, ces lub roob zoov Lis Npaas yuav hloov ua ib lub vaj txiv ntoo, hos lub vaj txiv ntoo yuav hloov ua hav zoov. 18 Hnub ntawd, cov neeg lag ntseg yuav hnov cov lus nyob hauv phau ntawv, cov dig muag qhov muag yuav pom kev, yuav dim ntawm qhov tsaus ntuj dub nciab.

19 Cov neeg me yuav zoo siab tuaj nyob hauv HUAB TAIS, cov pluag yuav diaj diaj luag nyob hauv His Xas Lais tus Ntshiab. 20 Yuav tsis muaj neeg ua nruj ua tsiv ntxiv, tus thuam luag yuav ploj mus, tsoom neeg nyas kev phem yuav ploj ntais. 21 Cov neeg uas hais ib lo lus ua tau kom luag raug txim, cov neeg cuab ntxiab rau tus txiav txim nyob ntawm lub rooj loog, cov lam ua phem rau tus siab ncaj, lawv yuav ploj tas huv tib si.

22 Vim li ntawd, HUAB TAIS, Yas Kos tsev neeg tus Tswv Ntuj, tus cawm Has Nplas Has dim nws hais li no : Txij no mus, Yas Kos yuav tsis raug kev txaj muag ntxiv.

23 Lawv yuav pom cov hauj lwm kuv ob txhais tes ua nyob nruab nrab hauv Yas Kos, lawv yuav tshaj tias kuv lub npe ntshiab. Lawv yuav tshaj tias Yas Kos tus Ntshiab nws Ntshiab tiag. Lawv yuav ntshai His Xas Lais tus Tswv . 24 Cov tswv yim yuam kev yuav rov thoob tsib. Cov neeg yws taus yuav paub txuj.

**Muaj ib lub caij uas His Xas Lais yuav vam meej. 30 : 18 - 26.**

**30** 18 HUAB TAIS npaj siab zam  
rau nej, nws yuav sawv tsees los  
hlub nej, vim HUAB TAIS yog ib tug  
Tswv siab ncaj. Cov neeg tso siab rau  
nws sawv daws muaj txoj hmoov zoo.  
19 Muaj tseeb, Xis Yoos haiv neeg uas  
nyob Yes Lus Xas Les, tsis tas koj yuav  
quaj ntxiv : nws hnov koj lub suab quaj  
quaj. Nws nyuam qhuav hnov koj, nws  
yuav teb rau koj sai.  
20 Thaum Huab Tais muab cov mov  
txhawj xeeb thiab cov dej iab dej daw rau  
koj tas lawm, mas tus qhia koj yuav tsis  
nyob nrug deb ntawm koj ntxiv, koj qhov  
muag yuav pom tus qhia koj. 21 Koj pob  
ntseg yuav hnov ib lo lus ntawm koj  
nraub qaum tuaj tias :  
"Ntsia txoj kev ntawm no, koj taug mus  
mas ! Koj mus rau sab xis los mus rau sab  
laug kuj tau."  
22 Cov nyijaj vov koj, cov kub plooj koj  
thiab cov mlom dab nchuav, koj yuav  
saib yog tsis huv. Koj yuav muab laim  
pov tseg, koj yuav hais tias :  
"Nej tawm ntawm no mus mas !"  
23 Tswv Ntuj yuav pub nag los ywg cov  
noob koj tseb rau hauv av. Ces cov mov  
ntawd yuav qab thiab zoo yug koj lub  
cev. 24 Tas koj cov tsiaj yuav noj cov  
npluag qab ntsev uas xuas vab tsoov.  
25 Thaum txog hnub sib tua ua lwj liam  
uas cov sam thiaj siab vau tas, mas yuav  
muaj tej qhov dej thiab tej kwj deg ntws  
saum cov roob siab thiab saum cov hauv  
pes tib si los.  
26 Lub hli qhov pom kev yuav zoo li lub  
hnub qhov pom kev. Lub hnub qhov pom  
kev yuav muaj zog dua xya npaug, ib yam  
li xya hnub qhov pom kev. Hnub ntawd  
HUAB TAIS yuav qhwv nws haiv neeg  
cov pob txha lov, yuav kho lawv cov  
qhov txhab.

**His Xas Lais yuav dim txim, yuav  
nyob nyab xeeb. 35 : 1 - 10.**

**35** 1 Cov teb chaws suab puam thiab  
teb quav poj, nej kaj tsij zoo siab  
mog. Lub tiaj maj sab, koj kav tsij dhia  
daj dhia luag, thiab tawg paj xws li cov  
paj iab, tawg ib phaum tas, ib phaum tuaj  
! Kom nws kav tsij dhia hom khaj zoo  
siab luag ntxhwb ntxhi, ua suab ntas ntua.  
2 Ntuj pub Lis Npas lub koob meej rau  
lub tiaj maj sab. Lawv yuav pom Lis  
Npas lub koob meej, yuav pom peb tus  
Tswv Ntuj lub hwj chim ci ntsa iab.  
3 Nej ua kom cov tes qaug zog rov muaj  
zog, ua kom cov hauv caug ntshaus raws  
rov khov.  
4 Nej hais rau cov siab muag tias :  
"Nej ua siab loj ! Nej txhob ntshai !  
Ntsia saib ! Nej tus Tswv Ntuj nyob  
ntawm no !"  
Kev rob caub tab tom tuaj, Tswv Ntuj cov  
txim pauj neeg cov txhaum tuaj cawm  
peb. 5 Ces cov dig muag ob lub qhov  
muag rov rua hlo, cov pob ntseg lag yuav  
qhib plho.  
6 Tus neeg ceg tawv dhia nrawm xws li  
tus muas lwj. Tus nplaig txhav qw tej  
suab zoo siab. Vim ib co dej txhawv  
hauv cov teb chaws suab puam los, tej tus  
dej ntws hla cov teb chaws maj sab.  
7 Thaj av kub ntaiv yuav hloov ua pas  
dej. Lub teb chaws tuag dej yuav txhawv  
tej tus kaus dej txaws txua tawm los.  
Thaj chaw uas hma ua zes nyob, yuav  
hloov ua tiaj tauj thiab tiaj ncaug zom  
ntawv.  
8 Nyob ntawd, yuav muaj ib txog kev  
ntshiab huv, tis npe hu ua "Kev Qee."  
Tsis muaj ib tug neeg tsis huv yuav mus  
tau txoj kev ntawd, 9 yuav tsis muaj  
tsov, tsis muaj tsiaj tom neeg taug txoj  
kev ntawd ntxiv, cov uas Ntuj txhiv lawv

thiaj tau taug xwb.

10 Cov neeg uas HUAB TAIS txhiv yuav rov qab los, lawv yuav chaws mus hauv Xis Yoos thiab nqua suab zoo siab, ib txog kev zoo siab ib txhiab ib txhis roos lawv taub hau. Kev luag ntsuag qees thiab kev lom zem ua lawv luag, kev iab kev khwv thiab kev ntsaj ploj ntais mus.

**Tus vaj Es Xes Kias mob. Ntuj ntxiv siav rau nws.**

**38 : 1 - 6 + 21 - 22 + 7 - 8.**

**38** 1 Muaj ib hnub, tus vaj Es Xes Kias tau ib tug mob hnyav kawg. Yaj Saub His Xais tuaj xyuas nws, His Xais hais rau nws tias : "HUAB TAIS hais li no : koj tu koj lub tsev, vim koj yuav tuag, koj yuav tsis tau ua neej nyob ntxiv."

2 Ces Es Xes Kias tig hlo rau tim phab ntsa, nws thov HUAB TAIS tias :

3 "Ab ! HUAB TAIS, thov koj nco ntsoov tias kuv tau taug kev nyob ntawm koj xub ntiaq, kuv npuab koj, tsis ua ntau lub siab, kuv tau ua yam uas koj pom zoo."

Es Xes Kias quaj tas los quaj thiab.

4 HUAB TAIS hais rau His Xais tias :

5 "Koj mus hais rau Es Xes Kias tias : HUAB TAIS hais li no : Kuv tau hnov koj zaj thov, kuv tau pom koj cov kua muag. Koj ntsia, kuv ntxiv kaum tsib xyoos rau koj lub hnub nyoog. 6 Kuv yuav npo koj thiab npo lub tsheej no kom dim ntawm tus vaj As Xws txhais tes. Kuv yuav pov hwm lub tsheej no."

Tus Tswv Ntuj muaj hwj huam hais li ntawd. 21 His Xais hais tias :

"Nej muab ib lub ncuav txiv ncuav pias los npuab lub qhov txhab, ces nws yuav zoo."

22 Es Xes Kias hais tias :

"Yuav muaj lub cim twg ua kom kuv paub tias kuv yuav mus pem HUAB TAIS lub tsev ?"

7 His Xais teb tias :

"HUAB TAIS yuav ua li no rau koj paub tias nws ua raws li lo lus nws hais ntawd. Nws hais tias : 8 Nyob ntawm As Kas daim txiag zeb ntsuas hnub, kuv yuav ua kom duab ntxoov ntxoo thaub rov qab kaum teev."

**His Xais ceeb toom cov lus nplij His Xas Lais. 40 : 1 - 10.**

**40** 1 Nej tus Tswv Ntuj hais tias :

"Nej nplij kuv haiv neeg, nej nplij lawv mas ! 2 Nej hais lus rau hauv Yes Lus Xas Les nruab siab. Nej hais nrov nrov rau nws tias nws lub caij ua qhev dhau lawm. Nws them txim txhaum tas lawm. Cov xwm uas nws txais ntawm HUAB TAIS txhais tes los them nws cov txhaum twb tshaj nws cov txhaum ob npaug lawm."

3 Muaj ib lub suab qw tias :

"Nej npaj ib txog kev hauv teb chaws suab puam rau Tswv Ntuj taug. Nej ncaws ib txog kev ncaj hauv cov teb chaws quav poj rau peb tus Tswv Ntuj.

4 Nej txhub cov hav tob kom siab, kom cov roob thiab cov hauv toj cia li qis, kom cov tiaj muaj pov toj, hloov ua hav tiaj tus yees, kom cov toj ntxhab hloov ua tshaw puam. 5 HUAB TAIS lub hwj chim yuav tawm los. Txhua tus muaj lub cev nqaij puav leej yuav pom lub hwj chim, vim HUAB TAIS lub ncauj tau hais lus.

6 Ib lub suab nrov tuaj tias :

"Koj qw mas !"

Kuv hais tias :

"Kuv yuav qw dab tsi ?"

HUAB TAIS hais tias :

"Txhua tus muaj lub cev nqaij zoo ib yam

li lub paj nroj tom tej nras. 7 Thaum HUAB TAIS tshuab pa tuaj mas tsob nroj qhuav, ces lub paj ntsws.

8 Tsob nroj qhuav, lub paj zeeg, tab sis peb tus Tswv Ntuj lo lus yuav nyob mus li."

9 Koj yog tus fi tsab xov zoo no mus rau Xis Yoos. Koj nce mus saum ib lub roob siab, koj tsa suab qw nrov nrov mas ! Koj yog tus fi tsab xov zoo mus rau Yes Lus

Xas Les, koj txhob ntshai cuab suab. Koj hais rau cov nroog Yus Das tias : "Ntsia ntawm no saib, yog nej tus Tswv Ntuj."

10 Saib HUAB TAIS Tswv Ntuj nyob ntawm no. Nws tuaj txog, nws muaj hwj huam ! Nws txhais npab ua tswv kav sawv daws. Nej ntsia tus nqi zog nrog nws. Cov nyiaj nws them nyob ntawm nws xub ntiaq.

**Tswv Ntuj lub hwj xyeej loj.  
40 : 21 - 31.**

21 Nej tsis paub qhov no lod ? Nej tsis tau hnov hais txog qhov no lod ? Txij lub hauv paus los tsis muaj tus tau ceeb toom qhov no rau nej lod ? Nej tsis to taub tias lub ntuj txawb rau saum dab tsi ?

22 Tswv Ntuj zaum saum lub voj xov ntiaj teb, cov neeg nyob ntiaj teb zoo li ib co kooj. Tswv Ntuj nrhab lub ntuj xws li ib daim ntaub nyias nyias. Nws nthuav lub ntuj xws li ib lub tsev tsam phooj uas tib neeg nyob hauv.

23 Tswv Ntuj ua kom cov vaj yaj ntshis, nws ua kom ntiaj teb cov nom txiav txim ploj ntais. 24 Lawv nyuam qhuav cog nyuam qhuav tseb, lawv tus kav nyuam qhuav nrhau cag nyob hauv av, Tswv Ntuj tshuab pa rau lawv, lawv cia li qhuav. Cua daj cua dub nqa lawv mus xws li ib co quav nyab npleg.

25 Tus Ntshiab hais tias : nej yuav muab kuv los piv rau leej twg, nej thiab hais tau tias kuv loj ib yam li tus ntawd ?

26 Nej tsa muag ntsia puag saud saib : leej twg tsim cov txheej ntuj ? Tus tau ua kom tsoom hnuh qub tawm los tas huv tib si, nws tuav lawv lub npe hu kom los tas tib si : nws lub zog loj npaum no, nws lub hwj huam loj npaum no : yeej tsis muaj ib lub uas tsis tawm los.

27 Yas Kos, vim li cas koj hais lo lus no : "Kuv txoj hmoov nyob nraim ntawm HUAB TAIS."

His Xas Lais, vim li cas koj hais tsis tseg tias :

"Kuv tus Tswv Ntuj tsis pom kuv lub peev xwm ?"

28 Puas yog koj tseem tsis tau paub tsis tau hnov qhov no ? Yam li HUAB TAIS yog ib tug Tswv Ntuj nyob mus ib txhiab ib txhis. Nws tsim cov npoo ntiaj teb. Nws tsis qaug zog tsis sab. Neeg ntsuas tsis tau nws txoj kev ntse.

29 Tswv Ntuj ntxiv zog rau tus neeg qaug zog, nws ntxiv zog kaum npaug rau tus tsis muaj zog. 30 Cov me nyuam hluas txawj qaug zog txawj sab, cov hluas qhov kawg lawv kuj ntog.

31 Tab sis cov neeg tos txog HUAB TAIS, lawv lub zog rov tshiab tuaj, lawv tej tis tej tw hlav xws li tis tw dav, lawv khiav tsis paub sab, lawv mus kev tsis paub qaug zog.

**Tswv Ntuj nrog nraim His Xas Lais,  
kom His Xas Lais muaj zog.**

**41 : 8 - 10 + 13 - 16.**

**41** 8 His Xas Lais, koj yog kuv tus tub txib. Yas kos, koj yog tus kuv tau xaiv, Has Nplas Has tsoom xeeb ntxwv, koj yog kuv phooj ywg.

9 Koj nyob puag tim npoo ntiaj teb, kuv

tau tuav koj, koj nyob hauv tej xeev ntuj deb deb, kuv tau hu koj los. Kuv tau hais rau koj tias : koj yog kuv tus tub txib, kuv tau xaiv koj, kuv tsis tau xyeeb koj.

10 Koj txhob ntshai, vim kuv nrog nraim koj. Koj qhov muag txhob txhawj, vim kuv yog koj tus Tswv Ntuj. Kuv ua kom koj muaj zog, kuv tuaj tsom kwm koj, kuv cev kuv txhais tes xis yeej yeeb ncuab los nres koj.

13 Vim tias kuv yog HUAB TAIS, yog koj tus Tswv Ntuj, kuv tuav koj txhais tes xis, kuv hais rau koj tias : koj txhob ntshai, kuv tuaj tsom kwm koj. 14 Koj txhob txhawj ! Yas Kos thiab His Xas Lais, kuv tuaj tsom kwm koj. Yog lo lus uas Huab Tais ceeb toom.

15 Koj saib, kuv muab koj los ua ib lub tshuab ntaus nplej tshiab muaj ob leej hniav. Koj yuav zom cov roob kom ua hmoov. Koj yuav muab cov hauv roob txiav ua xim quav nyab.

16 Thaum koj tsoov, cua yuav pus cov quav nplej mus. Nthwv cua hlob yuav siv zog ntsawj. Ntawm koj mas koj yuav zoo siab nyob hauv HUAB TAIS, koj yuav muaj koob meej nyob hauv His Xas Lais tus HUAB TAIS Ntshia.

**Tswv Ntuj yuav coj nws haiv neeg ntawm Npas Npis Los teb rov qab los. 41 : 17 - 20.**

17 Cov neeg txom nyem thiab cov neeg pluag nrhiaj dej haus, tab sis lawv nrhiaj tsis tau dab tsi li. Lawv tus nplaig qhuav vim lawv nqhis dej. Kuv yog HUAB TAIS, kuv yuav mloog lawv cov lus thov kuv. Kuv yog His Xas Lais tus Tswv Ntuj, kuv yuav tsis tso lawv pov tseg.

18 Kuv yuav ua kom muaj tej tus dej txhawv nyob saum cov hauv roob do cuas. Yuav ua kom tej lub qhov dej

txhawv hauv cov hav tiaj. Kuv yuav ua kom cov av quav poj hloov ua qhov dej txhawv.

19 Nyob hauv cov teb chaws suab puam kuv yuav cog ntoo ciab, cog paj huab poob, cog ntoo qhib, cog txiv ntoo roj thiab cog thuv rau. 20 Kom lawv pom thiab paub, kom lawv muab siab rau, lawv to taub tias HUAB TAIS txhais tes tau ua tej yam ntawd. His Xas Lais tus Ntshia tau tsim tej ntawd.

**Lus paj huam cav txog Tswv Ntuj tus tub txib. Zaj ib. 42 : 1 - 9.**

**42** 1 Nej ntsia ! Kuv tus tub txib uas kuv nres, tus kuv xaiv, tus kuv nyiam tas siab. Kuv tau txawb kuv lub tswv yim los roos nws. Nws yuav piav Txoj Cai rau cov kuj cuab.

2 Kuv tus tub txib yuav tsis nthe, tsis hais nrov, tsis ua suab ncha nyob ntawm tej kev hauv nroog. 3 Nws yuav tsis lov tus txhiav quag, nws lub siab pheej xeeb yuav piav Txoj Cai.

4 Kuv tus tub txib yuav tsis ntaus siab me, tsis quag zog mus txog hnub nws tsa kev ncaj kav ntiaj teb. Cov pov txwv tos txog nws Txoj Cai. 5 HUAB TAIS Tswv Ntuj hais li ntawd. Tswv Ntuj yog tus tsim thiab nthuav cuaj txheej ntuj, nws yog tus txheeb lub ntiaj teb thiab txhua yam tawm hauv ntiaj teb los, nws yog tus ua kom tsoom neeg nyob ntiaj teb thiab txhua yam ua tau pa.

6 Kuv yog HUAB TAIS, kuv tau hu koj los nyob hauv txoj kev ncaj, kuv tau tuav koj tes, kuv tau puab koj, kuv tau xaiv koj los ua kuv tus tub txib tsim haiv neeg cog lus, kuv tau xaiv koj los ua lub teeb pom kev kaj cov kuj cuab.

7 Kuv xaiv koj los ua tus qhib cov dig muag qhov muag, kuv tau xaiv koj los ua

tus tso cov neeg kaw hauv tsev loj faj kom tawm los, rho cov neeg nyob hauv qhov taub kom tawm hauv kev tsaus ntuj nti los.

8 Kuv yog HUAB TAIS, lo lus ntawd yog kuv lub npe. Kuv yuav tsis muab kuv lub hwj chim rau lwm tus. Kuv yuav tsis pub kuv lub koob meej rau cov mlom dab.

9 Thawj cov xwm twb tshwm sim lawm. Kuv xub tshaj ib co xwm tshiab uas tseem tsis tau tshwm los. Kuv hais tej xwm ntawd rau nej hnov.

**Tswv Ntuj yuav ua kom nws haiv neeg tawm ntawm pej kum teb los zaum ob. 43 : 16 - 21.**

**43** 16 HUAB TAIS yog tus tho ib txog kev hla nruab hiav txwv, tho ib txog kev nyob hauv cov dej muaj zog. HUAB TAIS ua kom Fas Las Oos cov tsheb rog, cov nees thiab tsoom tub rog siab loj sawv daws ua ke sawv mus ntaus rog.

17 Nyem no, lawv pw, lawv yuav tsis sawv, lawv tuag xws li tus teeb xeeb uas kug tas. HUAB TAIS hais li ntawd.

18 Nej txhob nco txog thawj cov xwm, txhob xav tswv yim txog tej yam thaum ub tshwm sid.

19 Ntsia saib ! Kuv rov ua dua ib yam tshiab. Yam ntawd twb hlav kaus. Nej tsis pom lod ? Muaj tseeb ! Kuv yuav tho ib txog kev hauv teb chaws suab puam, kuv yuav ua kom tej tus dej txhawv hauv cov teb chaws maj sab.

20 Tej tsiaj nruab nrang, tej hma thiab tej qaib nyuj yuav cav lus zoo txog kuv lub koob meej, vim kuv yuav ua kom dej txhawv hauv teb chaws suab puam los, haiv neeg kuv xaiv thiaj tau dej haus.

21 Haiv neeg kuv tsim los yuav cav txog

kuv lub koob meej mus li."

**His Xas Lais mom Tswv Ntuj lub txiaj ntsim. 43 : 22 + 24 - 25.**

22 Yas Kos, tus uas koj tau hu txog tsis yog kuv. His Xas Lais, koj dhuav kuv lawm. 24 Koj tsis tau siv nyiaj mus muas cov cem phij muaj nqis rau kuv. Koj tsis tau muab koj tej tsiaj txi Ntuj cov roj los pub rau kuv noj. Koj tsuas tau muab kev txhaum los cev rau kuv xwb, koj ua tub qaug kuv.

25 Tus so koj cov txhaum pov tseg yog kuv, niaj zaus yog kuv, vim kuv siab ntev, kuv tsis nco txog koj cov txhaum.

**Tswv Ntuj cov lus ceeb toom txog Kws Los. 45 : 1 - 8.**

**45** 1 HUAB TAIS hais li no txog Kws Los, uas yog nws tus Pleev. Kuv tau nthos nkaus nws txhais tes xis los ua kom cov kuj cuab vau rau hauv pem teb, los hle cov vaj tej siv sia, los qhib cov qhov rooj ob sab nyob ntawm nws xub ntiag, kom cov rooj loog txhob kaw nti.

2 Kuv yuav ua koj ntej mus, kuv yuav ua kom cov hauv toj hauv pes tiaj tuaj, kuv yuav tsoo cov rooj vag tooj ob sab kom tawg, kuv yuav muab cov ntsia liaj rooj hlau lov.

3 Kuv yuav muab cov txhab nyiaj thiab txhab kub uas luag muab zais los pub rau koj. Kom koj paub tias kuv yog HUAB TAIS. Kuv yog His Xas Lais tus HUAB TAIS. Kuv tuav koj lub npe hu.

4 Yog vim kuv tus tub txib Yas Kos, yog vim His Xas Lais tus kuv xaiv, mas kuv thiaj tuav koj npe hu. Thaum koj tseem tsis tau paub kuv, mas kuv twb pub ib lub npe muaj hwj chim rau koj. 5 Kuv yog

Huab Tais, tsis muaj lwm tus Huab Tais. Dhau kuv lawm mas tsis muaj lwm tus Tswv Ntuj ntxiv. Thaum koj tseem tsis tau paub kuv, mas kuv ua kom koj tuav ntaj tuav hmuv, 6 kom txij hnub tuaj mus txog hnub poob, paub tias dhau kuv lawm mas tsis muaj dab tsi li.

Kuv yog HUAB TAIS, tsis muaj dua lwm tus HUAB TAIS.

7 Kuv puab qhov pom kev, kuv tsim qhov tsaus ntuj, kuv tsim kev noj qab nyob zoo, kuv tsim kev txom nyem. Kuv yog HUAB TAIS, kuv tsim tag txhua Yam ntawd.

8 Cuaj txheej ntuj, nej tso txoj kev ncaj nqes txheej saud los. Kom cov huab tso kev ncaj nqes los xws li dej nag. Kom lub ntiaj teb qhib plho, ces txoj kev cawm neeg yuav tawg paj, thiab kev yeej nthaw kaus. Kuv yog HUAB TAIS, kuv tau tsim tag txhua Yam ntawd.

**Tswv Ntuj saib txhua haiv neeg.  
45 : 18 + 21 - 25.**

18 HUAB TAIS yog tus tsim cuaj txheej ntuj. Nws yog Tswv Ntuj, nws puab thiab txawb lub ntiaj teb. Nws tsis tau tsim lub ntiaj teb ua ntxhov quav niab. Nws puab lub ntiaj teb kom xis nyob. Nws hais tias :

21 "Kuv yog HUAB TAIS, tsis muaj lwm tus HUAB TAIS loj li kuv.

22 Npoo ntiaj teb, nej tig los rau kuv, nej thiaj yuav dim, vim kuv yog Tswv Ntuj, tsis muaj dua lwm tus.

23 Kuv cog lus tias : cov lus kuv lub ncauj hais tawm los yog cov lus tseeb tiag. Lo lus nram no thim tsis tau. Txhua lub hauv caug yuav txhos nyob ntawm kuv xub ntiag, txhua xeem lus yuav tuav txog kuv lub npe los cog lus li no :

24 tsuas yog nyob hauv HUAB TAIS

thiaj muaj kev yeej thiab kev muaj zog. Cov uas yav tas lawv npau taws rau nws, lawv puav leej tuaj cuag nws, lawv txaj muag tas nrho. 25 His Xas Lais tsoom xeeb ntxwv yuav yeej thiab yuav nto koob meej nyob hauv HUAB TAIS.

**His Xas Lais kheev lam mloog  
Tswv Ntuj. 48 : 17 - 19.**

**48** 17 HUAB TAIS, tus txhiv koj, His Xas Lais tus Ntshiab, nws hais cov lus no :

"Kuv yog koj tus HUAB TAIS, yog koj tus Tswv Ntuj, kuv yog tus qhia Yam muaj qab hau rau koj. Kuv yog tus coj koj mus taug txoj kev koj mus.

18 Ab ! Kheev lam koj muab siab rau mloog kuv cov lus qhia, mas koj kev vam meej yuav zoo li ib tug niam dej, koj txoj kev ncaj yuav zoo li cov dej nyob hauv hiav txwv. 19 Koj tsoom xeeb ntxwv yuav coob ib Yam li cov suab puam, cov tawm hauv koj nrog cev yuav coob ib Yam li cov tsig av.

**Lus paj huam cav txog Tswv Ntuj  
tus tub txib. Zaj ob. 49 : 1 - 6.**

**49** 1 Cov pov txwv, nej mloog kuv mas ! Cov haiv neeg nyob deb, nej muab siab rau mas ! Txij thaum kuv nyob hauv kuv niam plab, HUAB TAIS yeej hu kuv lawm. Txij thaum kuv nyob hauv kuv niam xub ntiag, HUAB TAIS tuav kuv npe. 2 Nws muab kuv lub ncauj los ua ib rab ntaj ntse zuag plias, nws muab kuv zais rau hauv nws txhais tes qhov ntxoov ntxoo. Nws muab kuv los ua ib xib xub vos ntse ntse, ntim hauv nws lub raj xub.

3 HUAB TAIS hais rau kuv tias :

"His Xas Lais, koj yog kuv tus tub txib,

kuv lub koob meej yuav nto nyob hauv  
koj."

4 Kuv teb hauv nruab siab tias :

"Kuv khwv, sab kuv kawg, tab sis kuv  
tsis tau dab tsi, kuv nkim kuv lub zog,  
kuv tsis tau dab tsi, qhov kuv tau yog yam  
uas yaj ntshis mus xwb. Tsis kav kuv  
muaj cai nyob ze HUAB TAIS. Kuv tus  
nqi zog yog nyob ze kuv tus Tswv Ntuj.

5 Nyem no, HUAB TAIS hais lus lawm.  
Nws yog tus puab kuv nyob hauv kuv  
niam nrog cev kom kuv tau ua nws tus  
tub txib. Kom tau coj Yas Kos rov los  
cuag nws, kom His Xas Lais rov qab los  
nrog nws nyob ua ke. Vim kuv muaj nqis  
nyob ntawm HUAB TAIS xub ntiag,  
thiab Tswv Ntuj yog kuv lub zog."

6 Tswv Ntuj hais tias :

"Koj yog kuv tus tub txib, koj rov tsa cov  
xeem Yas Kos kom sawv, thiab koj coj  
cov His Xas Lais uas kuv txuag kom lawv  
rov qab los. Qhov ntawd yog qhov  
tsawg. Kuv tseem xaiv koj kom koj ua  
lub teeb ci ntsa kaj cov kuj cuab. Kom  
kuv txoj kev cawm mus txog npoo ntiaj  
teb.

**Tswv Ntuj yuav coj cov His Xas  
Lais rov los nyob Yus Das teb.**

**49 : 8 - 15.**

8 HUAB TAIS hais li no :

"Thaum txog lub caij ntuj pub txiaj ntsim,  
kuv tau mloog koj thov. Thaum txog  
hnub cawm neeg, kuv tau tsob hwb koj.  
Kuv tau puab koj, kuv tau xaiv koj ua tus  
tsim haiv neeg cog lus, ua tus tsa lub teb  
chaws rov sawv, tus faib cov cuab tam  
uas luag tau muab rhuav. 9 Ua tus hais  
rau cov neeg kaw nyob pej kum teb tias :  
'Nej tawm los mog !' Ua tus hais rau cov  
neeg nyob hauv qhov tsaus ntuj tias :  
'Nej tawm tuaj kom sawv daws pom nej

mog !'

Lawv yuav coj tej tsiaj mus nog zaub  
ntawm tej ntug kev, cov roob do hau yuav  
tuaj tej roob zaub.

10 Lawv yuav tsis tshaib, tsis nqhis, cov  
cua kub thiab lub hnub yuav tsis ntaiv  
lawv. Vim tus hlub lawv yuav coj lawv  
kev, nws yuav coj lawv mus rau cov dej  
txhawv.

11 Kuv yuav muab tas cov roob huv si  
los ua tej txoj kev, kuv yuav txhub tej kev  
kom siab tuaj.

12 Ntsia saib ! Tej pab neeg sawv kev  
deb tuaj. Saib ! Ib co tuaj pej fab tuaj, ib  
co tuaj xib fab tuaj. Cov ntawd tuaj Xis  
Nim teb tuaj.

13 Cuaj txheej ntuj, nej qw suab lom zem  
mas ! Ntiaj teb nrang cais, koj dhia daj  
dhia luag mas ! Cov toj roob hauv pes,  
nej dhia hom khaj seev suab zoo siab, vim  
HUAB TAIS nplij nws haiv neeg, nws  
hlub nws cov neeg txom nyem.

14 Yav nram ntej ub, Xis Yoos hais tias :  
"HUAB TAIS tso kuv pov tseg ! HUAB  
TAIS hnov qab kuv lawm !"

15 Ib tug poj niam puas hnov qab tus me  
nyuam noj nws mis ? Nws yuav tsis hlub  
tus uas tawm hauv nws lub cev los lod ?  
Tab txawm tej niam ntawd hnov qab lawv  
cov me nyuam, mas kuv yuav tsis hnov  
qab Xis Yoos ib zaug li !

**Lus paj huam cav txog Tswv Ntuj  
tus tub txib. Zaj peb. 50 : 4 - 10.**

**50** 4 HUAB TAIS Tswv Ntuj tau  
muab cov thwj tim tus nplaig rau  
kuv. Nws qhia kuv kom kuv txawj hais  
ib lo lus nplij tus qaung zog. Niaj tag kis  
nws tsa kuv pob ntseg kom kuv tsim  
dheev, kom kuv mloog xws li cov thwj  
tim mloog.

5 HUAB TAIS Tswv Ntuj qhib kuv pob

ntseg, mas kuv tsis npau taws, kuv tsis yig, kuv tsis thaub qab.

6 Lawv ntaus kuv, mas kuv tig kuv nraub qaum rau lawv ntaus. Lawv xav rho kuv cov hwj txwv, mas kuv tig kuv sab plhu rau lawv. Lawv xav ib tawg ncuav rau kuv thiab xav nto quab ncaug rau kuv ntsej muag, los kuv tsis fee plhu rau lawv.  
7 Tab sis HUAB TAIS Tswv Ntuj tsom kwm kuv, vim qhov ntawd mas kuv tsis poob ntsej muag. Ces kuv ua kuv ntsej muag tawv li pob zeb. Kuv paub tias kuv yuav tsis raug kev txaj muag.

8 Tus pom tias kuv siab ncaj, nws nyob ze kuv, leej twg yuav txiav txim tau tias kuv muaj txhaum ? Kom peb ua ke tuaj ntawm lub rooj txiav txim mas ! Leej twg yog tus tau mus kom kuv rau cov nom txiav txim ? Kom nws kaj tsij txav los cuag kuv saib !

9 Ntsia saib ! HUAB TAIS Tswv Ntuj tsom kwm kuv ! Leej twg yuav txiav txim rau kuv tau ? Muaj tseeb ! Sawv daws yuav txawj ntshaus xws li ib ce tsoos uas kab yaim. Lawv lub cev yuav liam txwv tas."

10 Nyob hauv nej tus twg hwm HUAB TAIS, mas kom tus ntawd mloog HUAB TAIS tus tub txib lub suab. Tus mus taug txoj kev tsaus ntuj, nws tsis pom ib qho kaj, mas kom nws tso siab rau HUAB TAIS lub npe, kom nws kav tsij ib rau nws tus Tswv Ntuj.

**Cav lus zoo txog tus tshaj tias HUAB TAIS rov tsa Xis Yoos.**

**52 : 7 - 10.**

**52** 7 Tus xa lub Moo Zoo pem hauv sab tuaj, nws ob txhais taw zoo nkauj. Nws tshaj tias kev thaj yeeb tuaj lawm ! Nws qhia sawv daws paub tias kev noj qab nyob zoo tuaj txog lawm,

nws tuaj tshaj kev cawm neeg.

Nws hais rau Xis Yoos tias :

"Koj tus Tswv Ntuj ua vaj !"

8 Koj mloog mas ! Koj cov neeg zov keeb tsa suab, lawv ua ke qw zoo siab vim lawv pom xyeem ntawm qhov muag, HUAB TAIS rov qab los nyob Xis Yoos.

9 Yes Lus Xas Les cov tsev uas tau pob tas, nej sawv daws luag ua suab ntas ntua, vim HUAB TAIS nplij nws haiv neeg, nws txhiv Yes Lus Xas Les.

10 Tus HUAB TAIS Ntshiab loj npab ntshaus nyob ntawm txhua haiv neeg xub ntiag. Npoo ntuj npoo ntiaj teb pom peb tus Tswv Ntuj txoj kev cawm neeg.

**Lus paj huam cav txog Tswv Ntuj tus tub txib. Zaj plaub.**

**52 : 13 - 14 + 53 : 1 - 12.  
(Xyoo 541 - 543).**

13 Nej ntsia kuv tus tub txib Saib ! Nws yuav vam meej. Nws yuav nce mus, nws yuav sawv siab. Sawv daws yuav cav lus zoo txog nws.

14 Coob leej pom nws, lawv yuav nyob hab nuv, vim nws lub cev puas tas, nws tsis zoo li neeg lawm. Nws lub cev ntaj ntsug tsis zoo xws leej tib neeg cov tub lub cev. 15 Li ntawd, nws yuav ua kom ntau lub kuj cuab ceeb nkaus. Cov vaj yuav nyob qhov ncauj kaw ntom nti rau ntawm nws xub ntiag, vim lawv pom ib yam uas tsis muaj leej twg tau piav rau lawv, lawv hnov ib yam uas lawv tsis tau hnov hais txog.

**53** 1 Leej twg yuav ntseeg tau qhov peb hnov hais no ? HUAB TAIS lub hwj huam tawm los nyob saum leej twg ?

2 Tus tub txib tau loj hlob nyob ntawm HUAB TAIS lub xub ntiag, xws li ib tug

cag nrhau mus rau hauv thaj av qhuav, nws tsis muaj lub meej mom zoo saib, nws tsis muaj tus yam ntxwv zoo nyiam.

3 Tib neeg thuam nws, tso nws pov tseg. Nws yog ib tug neeg txom nyem thiab nquag raug mob. Nws zoo li ib tug neeg uas yus qhov muag pom dheev, yus pos qhov muag. Nws raug sawv daws thuam, peb tsis quav ntsej nws. 4 Tab sis, yam nws ris yog peb tej kev mob, yam nws nqa yog peb tej kev ntsaj. Peb xav tias Tswv Ntuj ntaus nws, thiab ua kom nws raug mob, ua kom nws poob hwj chim.

5 Tab sis tus tub txib raug luag nkaug, yog vim peb tej hauj lwm phem. Nws raug luag tsuj, yog vim peb cov txhaum. Lub txim uas nyob saum nws, yog tus nqi nws them kom peb tau nyob thaj yeeb. Nws tej thaj doog ua kom peb tej mob nkeeg zoo hlo.

6 Peb sawv daws zoo li ib co yaj poob zoo, peb nyias taug nyias tkoj kev. HUAB TAIS ua kom tkoj kev txhaum uas peb sawv daws taug rov los poob rau saum tus tub txib.

7 Tus tub txib raug luag hiam heev kawg, tab sis nws yeem ua tus me, nws tsis qhib ncauj. Nws ua zoo li tus yaj uas luag cab mus rau lub tsev tua tsiaj. Nws nyob twj ywm xws li tus yaj uas luag txiav nws cov plaub. Nws ua siab ntev nyaj, nws tsis qhib ncauj li.

8 Luag yuam, luag txiav txim kom tau rhuav tus tub txib pov tseg, leej twg tau xav tswv yim txog nws tkoj hmoo ? Luag muab nws tshem tawm hauv tsoom neeg ciaj lub ntiaj teb. Luag muab tus tub txib tua, vim peb tej kev txhaum.

9 Luag muab nws zwm ntxa xyaw cov neeg phem, muab nws faus ze cov neeg nkhaus. Tab sis nws tsis tau ua nrui ua tsiv rau leej twg. Nws lub ncauj tsis tau hais ib lo lus dag. 10 HUAB TAIS pom

zoo tsuj nws tus tub txib, nws ua kom nws tus tub txib raug mob raug nkees. Yog tus tub txib muab nws lub neej los ua

ib thaj txi Ntuj kho kev txhaum, nws yuav muaj xeeb zeeb ntxwv, nws ua kom nws lub hnub nyog kav ntev, nws txhais tes yuav ua tau raws li HUAB TAIS xav.

11 Vim nws tus plig tau raug txom nyem, nws yuav pom tkoj kev pom kev, nws yuav lub siab puv npo vim nws paub txuj. Kuv tus tub txib siab ncaj yuav ua kom ntau leej ncaj tuaj. Tus yuav ris lawv cov txhaum yog nws.

12 Yog vim li ntawd, kuv thiaj yuav pub kom muaj ib feem ua nws tug nyob hauv cov loj, nws yuav nrog cov muaj hwj xyeej txais cov yeeb ncuab lub cuab tam ib feem. Vim nws tau ris coob leej cov txhaum, thiab nws pab thov kev zam rau cov neeg txhaum.

**Yes Lus Xas Les cov tub ki yuav ri mus puv ntiaj teb vim Tswv Ntuj nyiam nws haiv neeg. 54 : 1 - 14.**

**54** 1 Yes Lus Xas Les, koj tsis muaj tub ki, koj tsis yug me nyuam, tab sis koj dhia daj dhia luag nqua suab zoo siab. Koj tsis tau paub kev mob plab, koj qw zoo siab mog ! Vim tus uas luag tso pov tseg muaj tub coob dua tus muaj ib tug txiv. HUAB TAIS hais li ntawd.

2 Koj ua koj lub tsev tsam phooj dav dua mas ! Koj nthuav koj cov ntaub, koj txhob cuaj khaum, koj txuas koj cov hlua kom ntev, koj npuj cov tswg kom khov khov, 3 vim koj yuav ri mus rau sab xis thiab sab laug. Koj tsoom xeeb ntxwv yuav muaj ib co kuj cuab ua lawv tug, lawv yuav mus nyob hauv tej lub nroog uas luag tau muab rhuav.

4 Yes Lus Xas Les, koj tsis txhob txhawj, koj yuav tsis ntsib kev txaj muag, koj tsis

txhob ntshai, koj yuav tsis poob tsim. Koj yuav hnov qab txoj kev txaj muag thaum koj yav hluas, koj yuav tsis nco txog txoj kev poob tsim thaum koj ua poj ntsuam.

5 Vim koj tus txiv yog tus tsim koj. Nws lub npe yog tus HUAB TAIS Nyob Siab. Tus txhiv koj yog His Xas Lais tus Ntshiab, nws hu ua Tswv Ntuj kav lub ntiaj teb.

6 Muaj tseeb ! Koj tus plig nyob hauv txoj kev lwj siab, xws li tus poj niam uas luag tso pov tseg. HUAB TAIS rov hu koj. Tus Tswv Ntuj hais tias :

"Tus poj niam uas yus yuav thaum hluas, yus puas yuav ntiab tau nws ? 7 Kuv tso koj tseg ib nyuag me ntsis, tab sis kuv lub siab hlub koj heev, kuv rov sau koj.

8 Kuv tau npau taws heev rau koj, kuv thiaj nraim kuv lub ntsej muag ib nyuag chim, tab sis kuv lub siab npuab koj mus tas ib txhis, kuv khuv leej koj. Tus HUAB TAIS txhiv koj, hais li ntawd.

9 Thaum Nos Hes tseem nyob, kuv cog lus tias dej yuav tsis nyab ntiaj teb ntxiv. Nyem no, kuv rov cog lus zoo li ntawd, kuv yuav tsis npau taws rau koj, Yes Lus Xas Les kuv yuav tsis tso hem thawj rau koj.

10 Cov roob txawj txav mus, cov hauv toj txawj vau, tab sis kuv lub siab npuab koj yuav tsis nrug deb koj, kuv kev cog lus nyob thaj yeeb yuav tsis ntshaus. Tus HUAB TAIS khuv leej koj hais li ntawd."

11 Yes Lus Xas Les, koj tau raug kev txom nyem loj kawg ! Cov cua daj cua dub tuaj nplawm koj. Tsis muaj leej twg nplij koj. Koj ntsia saib ! Kuv yuav muab pob zeb ci ua ntsa zeb xov koj, yuav muab pob zeb xia los ua taw ntsa, yuav muab pob zeb dawb ua cov qhov rooj.

12 Kuv yuav muab nyiaj muab kub los

ua ib lub yeej xov koj. Kuv yuav muab tsom iav los ua koj cov rooj loog. 13 Koj cov tub sawv daws ua HUAB TAIS thwj tim. Koj cov tub yuav nyob hauv txoj kev thaj yeeb loj. 14 Kev ncaj yuav ua kom koj nyob khov kho. Koj yuav nyob deb ntawm txoj kev raug luag quab yuam. Koj yuav tsis muaj kev txhawj xeeb ntxiv. Kev txhawj ntshai yuav tsis txav los ze ntawm koj.

**Tswv Ntuj pub ib hom txhiam xws rau cov neeg pluag.**

**55 : 1 - 3a.**

**55** 1 Nej sawv daws uas nej nqhis dej, nej tuaj cuag lub qhov dej. Nej cov uas tsis muaj nyiaj txiag, nej tuaj mas ! Nej muas nplej los ua ncuav mov ! Nej noj, tsis tas yuav them nyiaj. Nej muas cawv txiv ntoo muas mis nyuj, tsis tas yuav them dab tsi.

2 Ua cas nej yuav siv nyiaj los muas tej yam tsis yog mov noj ? Ua cas nej siv cov nyiaj nqe zog los muas tej yam tsis ua kom nej tsau plab ? Nej mloog kuv mas ! Ces nej yuav tau noj tej yam qab, nej yuav tau tej yam txhiam xws qab xis nej lub ncauj. 3a Nej tig ntsej los mloog kuv mog ! Nej mloog kuv, ces nej tus plig yuav muaj txoj sia nyob.

**Tswv Ntuj nrog His Xas Lais cog lus. 55 : 3b - 5.**

3b Kuv yuav nrog nej cog ib lo lus nyob mus ib txhiab ib txhis, raws li cov txiaj ntsim kuv hais ruaj tias kuv yuav muab rau Das Vis.

4 Yam li kuv tau tsa Das Vis los ua ib tug tim khawv rau cov haiv neeg, ua ib tug ntaus thawj qhia cov haiv neeg.

5 Yog zoo li no, Yes Lus Xas Les, koj

yuav hu ib lub kuj cuab uas koj tseem tsis tau paub, ces lub kuj cuab ntawd yuav khiaj tuaj cuag koj, yog vim HUAB TAIS koj tus Tswv Ntuj, yog vim His Xas Lais tus Ntshiab, nws ua kom koj nto koob meej.

**Huab Tais zaj tswv yim txawv neeg zaj tswv yim. 55 : 6 - 11.**

6 Nej nrhiav HUAB TAIS mog ! Nyem no yog lub caij zoo ntsib nws. Nws nyob ze lawm, nej hu txog nws mog !

7 Tus siab phem, nws yuav tso nws txoj kev phem tseg. Tus siab nkhaus tso nws lub tswv yim lim hiam tseg. Nws yuav tig los cuag HUAB TAIS. HUAB TAIS yuav khuv leej nws. Nws cia li los cuag Tswv Ntuj, vim Tswv Ntuj lub siab zam dav.

8 Nej zaj tswv yim tsis zoo li kuv zaj. Nej txoj kev tsis zoo li kuv txoj kev. Yog HUAB TAIS lus ceeb toom.

9 Lub ntuj nyob siab dua lub ntiaj teb, kuv txoj kev nyob siab dua nej txoj kev npaum li ntawd. Thiab kuv zaj tswv yim nyob siab dua nej zaj tswv yim.

10 Cov nag, cov daus uas poob saum ntuj los, yog lawv tsis tau pub dej rau ntiaj teb haus, mas lawv tsis rov mus saum ntuj. Cov nag thiab cov daus ua kom cov noob lwj thiab nthaw kaus, ua kom lub ntiaj teb txi txiv rau tus tseb, pub mov rau neeg noj, ces cov nag mam rov mus lawm saum ntuj.

11 Cov lus tawm ntawm kuv lub ncauj los kuj zoo li ntawd thiab. Nws tsis tau ua hauj lwm, mas nws tsis rov los cuag kuv. Kuv lo lus tsis tau leg qhov kuv xav, mas nws tsis rov los cuag kuv. Kuv lo lus tsis tau ua tiav qhov kuv xa nws mus ua, mas nws tsis rov los cuag kuv."

**Tswv Ntuj txais cov pej kum neeg uas zoo siab ntseeg txog nws.**  
**56 : 1 - 3 + 6 - 8.**

**56** 1 HUAB TAIS hais li no : "Nej mloog kev kawm Txoj Cai, nej coj kev haum pheej mog ! Kuv txoj kev cawm neeg tuaj yuav txog, kuv txoj kev yeej yuav tawm tuaj rau nej pom xyeem.

2 Tus neeg txawj tuag ua li ntawd mas nws txoj hmoov zoo, leej tib neeg tus tub uas nyob khov kho hauv txoj kev ntawd mas nws txoj hmoov zoo, vim nws caiv hnub xas npas tos, nws hwm hnub xas npas tos, nws cheem nws txhais tes kom txhob ua ib yam hauj lwm phem.

3 Tus pej kum neeg txhob hais tias : 'HUAB TAIS yuav ntiab kuv tawm hauv nws haiv neeg xwb !'

Tus neeg sam txhob hais tias : 'Ntsia saib ! Kuv yog ib tsob ntoo qhuav."

6 Cov pej kum neeg tuaj cuag HUAB TAIS, kom lawv tsob hwb HUAB TAIS, kom lawv nyiam HUAB TAIS lub npe, lawv ciaj ua HUAB TAIS cov tub txib. Vim lawv caiv hnub Xas Npas Tos, thiab lawv nyob khov kho hauv txoj kev nrog kuv cog lus.

7 Kuv yuav coj lawv mus saum kuv lub roob Ntshiab. Kuv yuav ua kom lawv zoo siab nyob hauv kuv lub tsev teev Ntuj.

Kuv yuav zoo siab txais cov thaj hlawv tsiaj thiab txi Ntuj nyob saum kuv lub thaj txi Ntuj. Vim kuv lub tsev yuav hu ua txhua haiv neeg lub tsev teev Ntuj.  
8 Tus HUAB TAIS Tswv Ntuj uas rov sau cov His Xas Lais raug ntiab, nws ceeb toom tias :

"Kuv yuav sau cov raug ntiab rov los ntxiv cov uas kuv twb sau tas lawm."

**Yoo mov raws kev tseeb.**

**58 : 1 - 14.**

**58** 1 HUAB TAIS hais li no:

"Koj kav tsij qw tiag mas, txhob tso tseg. Koj ua koj lub suab nrov ncha li lub hom, koj tshaj rau kuv haiv neeg tias : "Lawv ua cov hauj lwm phem." Koj tshaj rau Yas Kos tsev neeg tias : "Lawv ua txhaum."

2 Tus uas lawv niaj hnub nrhiav yog kuv, lawv xav paub kuv txoj kev xws li ib lub kuj cuab coj kev ncaj thiab tsis tso nws tus Tswv Ntuj Txoj Cai pov tseg. Lawv thov kom kuv muab tej Txoj Cai ncaj rau lawv, lawv xav nyob ze ntawm Tswv Ntuj.

3 Vim li cas peb yoo mov, koj ho tsis pom ? Thaum peb yuam peb tus plig, koj ho tsis paub ? Yog zoo li no : hnub uas nej yoo mov, nej leg nej tes dej num, nej yuam nej cov tub zog.

4 Hnub yoo mov nej pheej sib cav sib ceg, siv zog xuas nrig sib ntaus. Nej tej kev yoo mov hnub ntawd, tsis zoo ua kom nej lub suab nrov nyob saum ntuj. 5 Hnub uas tus neeg yuam nws tus plig puas yog txoj kev yoo mov uas kuv nyiam ? Koj ua taub hau qaij das xws li ib tug tauj, tso cev pw saum ntaub tsaj thiab plua tshawv, puas yog qhov tias koj hu ua yoo mov, hu ua ib hnub uas HUAB TAIS nyiam ?

6 HUAB TAIS cov lus ceeb toom yog cov no :

"Yoo mov raws li kuv nyiam, tsis yog ua ua li no lod ? Daws cov saw hlau tsis ncaj, tso cov neeg raug luag hiam kom rov nyob twj lij, muab cov quab lov tas huv si.

7 Yog koj muab koj cov mov los faib rau tus neeg tshaib noj, yog koj cheem cov txom nyem tsis muaj chaw nkaum kom

lawv nyob hauv koj tsev, yog koj muab ris tsho rau tus koj pom liab qab hnay, yog koj tsis tig nraub quam rau tus muaj lub cev nqaij zoo li koj.

8 Yog koj ua li ntawd , mas qhov pom kev yuav txhawv xws li hnub tuaj. Koj lub qhov txhab yuav nqawm sai, koj txoj kev ncaj yuav mus ua koj ntej. HUAB TAIS lub hwj chim yuav hwj koj.

9 Yog koj hu mas HUAB TAIS yuav teb, yog koj qw tias :

"Tsuag tsuag tuaj tsom kwm kuv."

Nws yuav hais tias :

"Kuv nyob ntawm no."

Yog koj tshem rab quab ntawm koj tsev mus, yog koj tsis tsa tes hem luag, yog koj tsis hais cov lus phem. 10 Yog koj faib koj cov mov rau tus neeg tshaib noj, yog koj pub dej rau tus neeg nqhis haus, mas koj qhov pom kev yuav sawv nyob hauv qhov tsaus ntuj. Koj qhov tsaus ntuj yuav pom kev nrig li lub hnub thaum tav su.

11 HUAB TAIS yuav coj koj kev tsis tseg, nyob hauv teb chaws qhuav nws yuav pub rau koj noj seem noj so, nws yuav ua kom koj cov pob txha rov muaj zog. Koj yuav zoo li ib lub vaj muaj dej ywg, koj yuav zoo li lub qhov dej txhawv uas dej ntws tsis txawj tu. 12 Koj yuav rov txhim cov qub tsev uas vau lawd. Koj yuav rov tsa cov ntsa zeb txheej thaud, luag yuav hu koj ua tus kho qhov tsev, tus kho cov qub vaj qub tsev uas vau tas.

13 Yog koj tsis tsuj xas npas tos, koj tsis leg koj cov dej num hnub ntshiab ntawd, yog koj hu xas npas tos ua "Hnub qab zib", yog koj hu HUAB TAIS hnub ntshiab ua "Hnub hwm", yog vim koj xav hwm xas npas tos, ces hnub ntawd koj tsis leg koj cov dej num, koj tsis piav koj tej zaj lus ntev. 14 Koj yuav qab siab nyob

hauv HUAB TAIS, kuv yuav coj koj rag nees saum ntav toj nyob hauv lub teb chaws, kuv yuav muab koj txiv Yas Kos lub cuab tam los yug koj.  
HUAB TAIS hais li ntawd.

**Yav tom ntej Yes Lus Xas Les yuav muaj koob meej. 60 : 1 - 6.**

- 60** 1 Yes Lus Xas Les, koj sawv !  
Kom koj qhov pom kev ci ntsa iab mas ! Vim koj qhov pom kev tuaj txog, thiab HUAB TAIS lub hwj chim sawv los ziab koj.  
2 Ntsia saib ! Qhov tsaus ntuj vov tas lub ntiaj teb. Ib twv huab dub vov cov haiv neeg. Tab sis HUAB TAIS lub hwj chim nyob hauv koj.  
3 Cov kuj cuab taug kev mus, nyob hauv koj qhov pom kev. Koj yog lub hnub tawm tuaj kaj cov vaj kom lawv pom kev mus.  
4 Koj tsa muag ntsia nyob ncig koj mog ! Koj yuav pom sawv daws sib sau tuaj cuag koj. Koj cov tub tuaj tej teb chaws deb tuaj, lawv ris koj cov ntxhais ntawm duav.  
5 Koj pom li ntawd, koj yuav ua ntsej muag luag ntxhi. Koj lub plawv yuav dhia paj paws, koj lub siab yuav nthuav. Tej txhab kub nram dej ntuj tuaj thawj koj. Cov kuj cuab tej nyiaj tej kub tuaj nyob hauv koj.  
6 Cov ntxhuav tuaj ua npoj ntws. Cov thauj tuaj ntawm Mas Dias thiab Es Fais. Lwm cov tuaj Ses Npas tuaj, lawv thauj kub thiab txab txiv yoov tuaj, lawv tshaj HUAB TAIS cov hauj lwm loj.

**Tus Yaj Saub txoj hauj lwm.**  
**61 : 1 - 3a + 5 - 6a + 8 - 10.**

- 61** 1 HUAB TAIS Tswv Ntuj lub

tsvv yim nyob saum kuv, vim HUAB TAIS pleev kuv. Nws tso kuv xa lub Moo Zoo rau cov neeg txheej qis, tshaj kev cawm rau cov thoj nam nyob pej kum teb, tshaj kev twj lij rau cov neeg nyob hauv tsev loj faj.

2 HUAB TAIS xa kuv mus tshaj HUAB TAIS ib lub xyoo pub txiaj ntsim, tshaj tias muaj ib hnub uas peb tus Tswv Ntuj yuav rob caub. HUAB TAIS xa kuv mus nplij cov neeg ntoo xyom kom sawv.

3 Nws muab ib txoj phuam los hloov lawv txoj xyom, pub ib co roj lom zem los hloov lawv cov tsoos tsho tu siab, kom lawv txhob ntsoos.

5 Ib co neeg tuaj ntawm lwm lub teb chaws tuaj, yuav nyob ntawm no zov nej cov tsiaj, cov pej kum neeg tej tub ki yuav ua nej cov tub zog laij liag thiab de txiv cawv.

6 Ntawm nej, mas lawv yuav hu nej ua "HUAB TAIS cov Leej Choj."

Lawv yuav tis npe rau nej ua :  
"HUAB TAIS cov tim xyoob."

8 Kuv yog HUAB TAIS, kuv nyiam kev ncaj, kuv ntxub txhua yam uas luag nyiag. Kuv yuav muab nqi zog rau cov His Xas Lais kom haum pheej. Kuv yuav nrog lawv cog ib lo lus nyob mus li tas ib txhis.

9 Lawv tsoom xeeb ntxwv yuav nto moo nyob hauv cov kuj cuab, cov xeeb tis yuav muaj suab npe nyob hauv cov haiv neeg. Tsoom neeg uas pom cov His Xas Lais yuav zeem tias lawv yog ib hom neeg uas HUAB TAIS foom hmoov zoo rau.

10 Kuv zoo siab tag nrho, kuv dhia daj dhia luag nyob hauv HUAB TAIS. Kuv tus plig dhia hom khaj nyob hauv kuv tus Tswv Ntuj, vim Tswv Ntuj muab kev cawm cov tsoos rau kuv hnav, nws muab kev yeej lub tsho tshaj sab qhwv kuv, xws li tus nraug vauv tshiab kho nws hauv

phuam, xws li tus nkauj nyab muab npauj kub npauj nyiag los coj.

**Yes Lus Xas Les yog Tswv Ntuj tus nkauj nyab tshiab.**

**62 : 1 - 5 + 11 - 12.**

**62** 1 Vim muaj Xis Yoos, kuv yuav tsis nyob twj ywm. Vim muaj

Yes Lus Xas Les, kuv yuav tsis so, mus txog lub caij nws txoj kev yeej tawm plaws xws li ib qho kaj, nws txoj kev yeej tawm plaws xws li ib teg tsau cig cig.

2 Cov kuj cuab yuav pom koj txoj kev yeej, tas cov vaj huv si yuav pom koj lub hwj chim. Luag yuav tis npe tshiab hu

koj, yog HUAB TAIS lub ncauj yuav qhia. 3 Koj yuav zoo li ib lub mom teev kub muaj hwj chim nyob hauv HUAB TAIS tes. Zoo li ib lub kaus mom ua vaj nyob hauv koj tus Tswv Ntuj xib teg.

4 Luag yuav tsis hais ntxiv txog koj tias : "Tus luag tso pov tseg."

Luag yuav hu koj tias :

"Kuv lub chaw zoo siab."

Luag hu koj thaj av tias :

"Nkauj nyab tshiab." Vim koj yuav yog HUAB TAIS chaw zoo siab thiab koj thaj av yuav ua nkauj nyab tshiab.

5 Tus tsim koj, nws yuav qaws koj ua nws txij nkawm zoo li ib tug tub hluas yuav ib tug ntxhais nkauj xwb. Koj yuav ua koj tus Tswv Ntuj zoo siab lom zem, xws li tus nkauj nyab ua nraug vauv lub chaw sov siab dhia daj dhia luag.

11 Ntawm no yog lo lus HUAB TAIS hais kom nrov mus txog npoo ntiaj teb.

Nej hais rau Xis Yoos tus ntxhais tias :

"Saib ntawm no, tus cawm koj tuaj yuav txog. Saib ntawm no, nws tuav koj nqezog, cov nyiaj them koj tes dej num nyob ntawm nws xub ntiag."

12 Luag yuav hu lawv tias :

"Haiv neeg Ntshiab, cov neeg uas HUAB TAIS txhiv."

Luag yuav hu koj tias :

"Tus uas ntuj nrhiav, lub tsheej uas ntuj tsis tso pov tseg."

**Thov kom Tswv Ntuj rov hlub nws haiv neeg.**

**63 : 16 - 17 + 19 + 64 : 3 - 8.**

**63** 16 HUAB TAIS, koj yog peb txiv. Has Nplas Has tsis paub peb lawm. His Xas Lais zeem tsis tau peb. HUAB TAIS, tus ua peb txiv yog koj. Txij txheej thaud los, koj lub npe hu ua "Tus txhiv peb."

17 HUAB TAIS, yog vim li cas koj thiaj ua kom peb poob zoo nyob deb ntawm koj txoj kev ? Yog vim li cas koj thiaj ua kom peb lub siab tawv thiab tsis xav hwm koj ? Thov koj rov los mas, vim koj cov tub txib thiab cov xeem neeg ua koj lub cuab tam.

19 Tau ntev los lawm peb yog cov neeg uas koj tsis tswj, peb yog cov neeg tsis tuav koj lub npe hu txog koj.

Ab ! Kheev lam koj nqes los, mas cov roob yuav muaj dej ntws ua ntshua niab.

**64** 3 Tsis muaj ib lub pob ntseg tau hniv, tsis muaj ib lub qhov muag tau pom lwm tus Tswv Ntuj ua zoo npaum li koj rau cov neeg tso siab rau koj. Koj mus cuag cov neeg, mus taug kev ncaj thiab nco nrain koj tej kev. Saib, koj tau npau taws, peb tau ua txhaum. Tau ntev los peb tsis npuab koj.

5 Peb sawv daws tau ua zoo li tus neeg tsis huv. Peb tej num zoo li ib co khaub ncaws tsuas. Peb sawv daws ntsws xws li cov nplooj ziab tshav. Peb cov txhaum ntsawj peb xws li cua.

6 Tsis muaj leej twg hu txog koj lub npe,

tsis muaj leej twg tsim dheev los nyob khov kho hauv koj. Vim koj muab koj lub ntsej muag zais, koj tso peb zwm rau peb cov txhaum.

7 Tsis kav, HUAB TAIS koj yog peb txiv. Peb yog av luaj, koj yog tus puab peb. Yog koj txhais tes puab peb sawv daws.

8 HUAB TAIS, koj txhob npau taws heev dhau. Koj txhob nco txog peb cov txhaum mus li. Thov koj ntsia mas ! Peb sawv daws yog koj haiv neeg.

**Lub ntuj thiab lub ntiaj teb tshiab.**  
**65 : 17 - 21.**

**65** 17 Saib ntawm no, kuv tsim cov txheej ntuj tshiab thiab ib lub ntiaj teb tshiab. Yuav tsis nco txog yav tas los lawm. Yav tas lawd, yuav tsis ntsawv lub siab ntxiv.

18 Kuv tsim ib txog kev hom khaj mus ib txhiab ib txhis. Ntsia saib ! Kuv tsim Yes Lus Xas Les kom nws dhia hom khaj, kuv tsim nws tsoom pej xeem kom dhia zoo siab.

19 Kuv yuav dhia zoo siab cav txog Yes Lus Xas Les, yuav dhia hom khaj cav txog kuv haiv neeg. Nyob hauv Yes Lus Xas Les yuav hnov suab lom zem.

20 Nyob Yes Lus Xas Les, yuav tsis muaj cov me nyuam mos Yug los nyob ob peb hnub xwb. Tsis muaj ib tug neeg laus uas nyob tsis puv nws lub hnub nyooog. Tus tuag hluas tshaj, mas nws lub hnub nyooog twb puv ib puas xyoo. Tus nyob tsis puv ib puas xyoo yog vim nws raug tsawm.

21 Nyob Yes Lus Xas Les, lawv yuav txhim tsev rau lawv nyob. Lawv yuav cog ib co ntoo txiv cawv, lawv yuav tau noj cov txiv.

**Haiv neeg Tswv Ntuj xaiv nyob thaj yeeb.** **66 : 10 - 14.**

**66** 10 Nej kav tsij nrog Yes Lus Xas Les zoo siab mog ! Nej sawv daws uas nyiam Yes Lus Xas Les, nej dhia hom khaj rau nws mas ! Nej sawv daws uas nej tau ntoo xyom vim Yes Lus Xas Les, mas nyem no nej kav tsij dhia zoo siab hom khaj !

11 Nej thiaj yuav tau mis noj tsau npo, nej yuav tau ntxais nws lub mis nplij neeg nyob ntawm nws lub xub ntiag muaj hwj chim.

12 Vim HUAB TAIS hais li no:

"Ntsia saib ! Kuv coj kev vam meej mus cuag Yes Lus Xas Les zoo li ib tug niam dej, kuv coj tsoom kuj cuab kev nplua nuj mus cuag Yes Lus Xas Les xws li ib tug dej phwj. Lawv ris Yes Lus Xas Les cov mos liab ntawm duav, lawv plhws cov mos liab saum hauv caug.

13 Kuv yuav nplij nej xws li ib tug niam nplij nws tus me nyuam. Nyob hauv Yes Lus Xas Les kuj yuav muaj tus nplij nej.

14 Nej pom muaj li ntawd, nej yuav zoo siab dhia hom khaj, nej cov pob txha yuav tawg paj xws li nroj.

HUAB TAIS cov tub txib yuav paub HUAB TAIS txhais tes.

**Tswv Ntuj yuav txais tas tsoom kuj cuab los ua nws haiv neeg.**

**66 : 18 - 21.**

18 Kuv tuaj sau txhua lub kuj cuab thiab txhua xeem lus. Lawv yuav tuaj, lawv yuav pom kuv lub hwj chim.

19 Kuv yuav tsa ib lub cim nyob hauv cov kuj cuab. Kuv yuav xa cov neeg dim ntawm kev raug txim mus cuag cov kuj cuab, thiab cov pov txwv nyob deb uas tsis tau hnov hais txog kuv, tsis tau pom

kuv lub hwj chim. Cov dim ntawm kev  
raug txim yuav tshaj kuv lub koob meej  
nyob hauv cov kuj cuab. 20 Lawv yuav  
coj nej tsoom kwv tij tas huv si nyob hauv  
cov kuj cuab rov qab los, yuav cev lawv  
ua thaj txi HUAB TAIS. Tus caij nees kuj  
muaj, tus caij tsheb ob lub log los plaub  
lub log kuj muaj. Tus caij luij los caij  
ntxhuav kuj muaj.  
Lawv tuaj txog kuv lub roob ntshiab Yes  
Lus Xas Les. HUAB TAIS hais tias lawv  
ua xws li tsoom His Xas Lais, lawv cev  
toob xib nyob hauv cov phaj ntshiab huv  
los txi Ntuj hauv HUAB TAIS lub tsev.  
21 Kuv yuav tsa lawv tej tug los ua Leej  
Choj thiab ua Les Vis.